



Grad Sarajevo
City of Sarajevo

Bosna i Hercegovina
Federacija Bosne i Hercegovine
Kanton Sarajevo
Grad Sarajevo

GRADSKO VIJEĆE

Odluka
o uslovima i načinu sticanja statusa udruženja i fondacija
od posebnog značaja za Grad Sarajevo
(Prijedlog)

Predlagač: Gradonačelnica
Obrađivač: Gradska služba za lokalnu
samoupravu i razvoj grada

Sarajevo, novembar 2021. godine

Adresa: Hamdije Kreševljakovića 3
71000 Sarajevo, BiH
Tel: +387 33 216 659
Fax: +387 33 205 874
Email: gsgv@sarajevo.ba
Web: gradskovijece.sarajevo.ba



Na osnovu člana 26. stav 1. tačka 2. Statuta Grada Sarajeva („Službene novine Kantona Sarajevo“, broj 34/08), Gradsko vijeće Grada Sarajeva, na __. sjednici održanoj __. __. 2021. godine, donijelo je:

(Prijedlog)

**Odluku
o uslovima i načinu sticanja statusa udruženja i fondacija
od posebnog značaja za Grad Sarajevo**

POGLAVLJE I OPĆE ODREDBE

**Član 1.
(Predmet Odluke)**

Ovom odlukom utvrđuju se uslovi i način sticanja statusa udruženja i fondacija od posebnog značaja za Grad Sarajevo.

**Član 2.
(Definicija)**

Udruženja i fondacije, u smislu ove odluke su, pravna lica osnovana i registrovana u skladu sa pozitivnim propisima o udruženjima i fondacijama.

**Član 3.
(Status posebnog značaja)**

Status posebnog značaja za Grada Sarajevo mogu steći udruženja i fondacije čija djelatnost doprinosi afirmaciji grada Sarajeva kao glavnog grada Bosne i Hercegovine i Federacije Bosne i Hercegovine, u zemlji i svijetu, te čije su aktivnosti od interesa za građane i razvoj Grada Sarajeva kao multikulturne i multietničke sredine.

POGLAVLJE II USLOVI ZA STICANJE STATUSA POSEBNOG ZNAČAJA ZA GRAD SARAJEVO

**Član 4.
(Opći uslovi)**

Udruženja i fondacije koje mogu steći status posebnog značaja za Grad Sarajevo moraju ispunjavati i sljedeće opće uslove:

- a) da su osnovane i registrovane u skladu sa pozitivnim propisima;
- b) da svoje aktivnosti razvijaju na području grada Sarajeva;
- c) da ne obavljaju aktivnosti u ime političke partije;
- d) da su podnijele izvještaj o utrošku sredstava, ukoliko su prethodno bile finansirane iz budžeta Grada Sarajeva.

**Član 5.
(Posebni uslovi)**

Pored općih uslova iz člana 4. Odluke, potrebno je da udruženja i fondacije ispunjavaju i sljedeće posebne uslove:

- a) značaj za Grad Sarajevo u smislu težnje za koncentrisanjem kulturnog, urbanog i ekonomskog razvoja grada, kao metropole;
- b) stepen doprinosa afirmaciji Grada Sarajeva kao multikulturnoj i multietničkoj sredini;
- c) interes građana grada Sarajeva;
- d) doprinos jačanju tolerancije i razvoju demokratskog društva;

- e) afirmacija urbanog identiteta i vrijednosti;
- f) mogućnost uključivanja u međunarodne događaje kojima se omogućava afirmacija Grada Sarajeva kao administrativnog, kulturnog i turističkog centra.

Član 6. **(Prestanak statusa)**

Udruženju i fondaciji prestaje status od posebnog značaja za Grad Sarajevo u sljedećim slučajevima:

- a) Po sopstvenom zahtjevu;
- b) Brisanjem iz registra udruženja i fondacije nadležnog organa uprave u kojem je udruženje/fondacija registrovano;
- c) Ukoliko udruženje/fondacija nakon dodjele statusa od posebnog interesa i društvenog značaja za Grad Sarajevo ne realizuje aktivnosti i ciljeve utvrđene statutom, programom rada udruženja/fondacije ne podnese blagovremeno i tačno izvještaj o utrošenim sredstvima, godišnji izvještaj o radu usvojen od strane ovlaštenog organa udruženja/fondacije-skupštine;
- d) Ukoliko se naruše kriteriji po osnovu kojih je utvrđen status udruženja i fondacije od posebnog značaja za Grad Sarajevo.

POGLAVLJE III NAČIN STICANJA STATUSA POSEBNOG ZNAČAJA ZA GRAD SARAJEVO

Član 7. **(Podnošenje zahtjeva)**

Zahtjev, odnosno inicijativa za sticanje statusa posebnog značaja za Grada Sarajeva, dostavlja se gradonačelniku/ci Grada Sarajeva i to od strane ovlaštenih lica/organa udruženja i fondacija. Zahtjev, odnosno inicijativa iz stava 1. ovog člana, mora sadržavati obrazloženje i dokaze o ispunjavanju uslova iz čl. 4. i 5. Odluke.

Član 8. **(Odluka o sticanju statusa)**

(1) Podneseni zahtjev, odnosno inicijativu, nadležna Služba procjenjuje sa stanovišta uslova utvrđenih ovom odlukom i svoje mišljenje sa prijedlogom dostavlja gradonačelniku/ci Grada Sarajeva. Gradonačelnik/ca Grada Sarajeva razmatra prijedlog nadležne Službe te Gradskom vijeću Grada Sarajeva upućuje prijedlog Odluke o utvrđivanju posebnog značaja za određeno udruženje ili fondaciju, o čemu Gradsko vijeće donosi konačnu odluku.

(2) Obavezan sadržaj odluke o utvrđivanju posebnog značaja za određeno udruženje ili fondaciju je iznos finansijskih sredstava iz budžeta Grada Sarajeva kojima će udruženje ili fondacija biti finansirani te vremenski period (jedna ili više budžetskih godina) finansiranja.

Član 9. **(Obavijest o neispunjavanju uslova)**

U slučaju da podneseni zahtjev, odnosno inicijativa, ne ispunjava uslove utvrđene ovom odlukom, nadležna Služba podnosiocu upućuje obavijest sa obrazloženjem o provedenom vrednovanju.

POGLAVLJE IV NADZOR

Član 10. (Nadzor)

(1) Gradonačelnik/ca Grada Sarajeva osigurava nadzor nad provođenjem finansiranja udruženja ili fondacije iz budžeta Grada Sarajeva, putem nadležnih službi.

(2) U praćenju nadzora, nadležne službe, svaka iz djelokruga svoga rada, prate realizaciju aktivnosti i daju mišljenje o izvršenom nadzoru gradonačelniku/ci.

POGLAVLJE V ZAVRŠNE ODREDBE

Član 11. (Izmjene i dopune)

Izmjene i dopune Odluke vrše se na način i po postupku za njeno donošenje.

Član 12. (Rodna ravnopravnost)

Gramatička terminologija korištenja ženskog i muškog roda u ovoj Odluci podrazumijeva uključivanje oba roda.

Član 13. (Stupanje na snagu)

Ova Odluka stupa na snagu narednog dana od dana objavljivanja u „Službenim novinama Kantona Sarajevo“.

PREDSJEDAVAJUĆI GRADSKOG VIJEĆA

Jasmin Ademović

**Broj:
Sarajevo, __. __. 2021. godine**

O B R A Z L O Ž E N J E

PRAVNI OSNOV

Pravni osnov za donošenje Odluke sadržan je u članu 26. stav 1. tačka 2. Statuta Grada Sarajeva, kojim je propisano da Gradsko vijeće donosi odluke, druge propise i opće akte i daje njihovo tumačenje.

RAZLOZI DONOŠENJA

Cijeneći da Grad Sarajevo, unutar civilnog društva, pored uobičajene saradnje na osnovu već važećih odluka Gradskog vijeća i s njima u vezi propisanih procedura, koje čine pravni okvir za saradnju sa OCD-udruženjima i fondacijama, ima potrebu da uspostavi i poseban vid saradnje sa onim organizacijama za koje cijeni da su od posebnog interesa za Grad Sarajevo, Gradsko vijeće Grada Sarajeva programiralo je ovu temu i krenulo u redovnoj proceduri u donošenje ove Odluke. Tako je, na svojoj 6. sjednici koja je održana 29.09.2021. godine, Gradsko vijeće Grada Sarajeva utvrdilo Nacrt Odluke o uslovima i načinu sticanja statusa udruženja i fondacija od posebnog značaja za Grad Sarajevo i donijelo Zaključak o provođenju Javne rasprave broj: 01-GV-02-1139/21.

Imajući u vidu da tokom javne rasprave nije bilo primjedbi, prijedloga i sugestija na Nacrt Odluke, stekli su se uslovi da Gradsko vijeće Grada Sarajeva razmatra Odluku u formi prijedlog i pristupi njenom donošenju.

FINANSIJSKA SREDSTVA

Finansijska sredstva za realizaciju ove Odluke obezbjeđuju se u Budžetu Grada Sarajeva.